



Liewe vriende,

In die laaste twee dissiplineskaplesse het ons oor praktiese beginsels vir 'heiligmaking' (geestelike groei) gesels. My gunstelig teksvers sê ons weerspieël die heerlijkheid vd Here; en word daarom al meer verander om aan die beeld van Christus gelyk te word. En so neem God se heerlijkheid wat uit ons straal steeds toe. Ek besef opnuut dat geestelike groei nie oor my beter lewe gaan nie, maar oor God wat die sentrale plek meer en meer in my wese inneem. Ons leef om Hom te verheerlik!



Ons reflekteer God se heilikeheid as ons, soos Moses, in Sy teenwoordigheid verkeer.

Volg-Jesus-reeks

Die volg-Jesus-reeks trek nou by die 26ste gesprek en soms skarrel ons om alles betyds in die drie tale gereed te hê. Die Here seën steeds die luisteraars hierdeur.

Luis, een van die wagte van Radio Nuru, was die afgelope naweek op familie besoek in Makonde gebied, so 50-60 km hiervandaan. Hy vertel dat oral waar hy gekom het, mense oor ons programme praat. Volgens hom het baie mense **openlik getuig** hoe hulle lewens deur hierdie reeks verander is – sommige gesinne leef in vrede vir die eerste keer in jare, ander het van geweld afgesien, ander is vry van verslawing en so aan.

Elke nou en dan vertel die **vrywilligers**, wat saam met ons aan hierdie opnames werk, ook hoe daar mense van verskillende oorde hulle kontak om te vertel wat die programme vir hulle beteken. Baie van hierdie mense het nie 'n 'kerklike' agtergrond nie, en is dus nuwe gelowiges uit die 'heidendom'.

Dit is vir ons 'n groot vreugde om sulke nuus te hoor en loof die Here telkens vir sy werking. Dit maak die baie ure (en dae) se sit voor die rekenaar en skryf aan hierdie programme 'n lekkerte.

Baba Awami rapporteer dat daar deesdae baie mense van Ibo na ons uitsendings luister, maar die groei onder die Mwani

luisteraars wat reageer is steeds baie klein.

Ons soektog na die geskikte **Mwani omroeper** duur voort - bid vir Bau wat binne die volgende maand in die huwelik tree en baie gretig is om ons te kom help nadat dit afgehandel is.



Bau, in rooi, het die korrespondente opleiding ook bygewoon. Bid saam ons vir wysheid oor die vul vd nuwe poste by Radio Nuru.

Koshuis-kinders

Die hoërskoolmeisies wat ons (veral oor naweke) besoek en met wie ons allerlei programme opneem se betrokkenheid het ook gegroei. Behalwe vir al die raaisels, en stories, het ons die afgelope tyd ook heelwat verse uit Spreuke opgeneem om tussen die musiek op die radio 'in te gooi'.

Sunette gesels ook soms met hulle oor geestelike sake. Ons het die jaar afgesluit deur die Jesus-film vir hulle te wys. Bid asb vir hierdie meisies, aangesien daar by sommige van hulle 'n merkbare openheid vir die Goeie Nuus is. Slegs een van hulle is 'n evangeliese Christen.



Vyf van ons buur-dogters wat Sunette help

Soos koshuiskinders maar is, is hulle ook gedurig honger, of net lus vir ietsie om aan te knibbel. Nou die dag vra twee van hulle vir my (Sunette) 'n rys, suiker en warm water om poeding te maak. Dit was maar 'n karige dis, en toe ek hulle vra of

hulle dit by hulle huise ook eet, se hulle - 'natuurlik nie, ons is nie honger as ons daar is nie.

.... en ander helpers

Ons is dankbaar vir elkeen wat bereid is om 'n bydrae tot die radio programme te maak. 'n Variasie van stemme en style hou die stasie interessant. **Prisca**, wat voorheen vir ons musiek vanaf Tanzanie gebring het, het weer by haar ouers gedurende die Universiteitsvakansie gekuier. Sy het 'n paar oulike programme kom opneem – o.a. 'n goeie program oor HIV/ Vigs wat ons op 1 Desember sal uitsaai.

	<p>Program hulp</p> <p>Prisca het 'n goeie aanslag met die programme. Haar ouers is geliefde mense in ons gemeenskap.</p>
--	--

Op Saterdag is daar nou 'RSG-styl' 'n **resep** op die lug. Allerlei mense uit allerlei agtergronde in allerlei tale word genader om hulle resepte te kom opneem. 'n Klompie van die resepte fokus op hoe om jou kos te bewaar vir latere gebruik.

Sonskyn, Werk en Speel



Ons het weer vir drie dae saam Carla by 'ons plekkie by die see' gaan kuier. Verniet!

Ons dogter, **Carla**, het weer vir ons kom kuier en was dit nie heerlik nie. Boonop kon ons saam met haar 'n **sendelingskonferensie** by die Meponda kampterrein langs die Malawi meer bywoon. Ons kon nostalgies terugdink aan toe ons meer as twintig jaar gelede daar begin kamp het. Die kampterrein is nou baie geriefliker, en dit was 'n lafenis om saam met ou vriende te kuier, bid en deel.



Konferensie-gangers. Die luister na mekaar en saam bid was vir my die hoogtepunt.

Alex van RAN

In dieselfde maand het ons ook besoek van Alex Walker, van Radio Africa Network, ontvang. Hy het ons, omroepers en vrywilligers se vaardighede kom opskerp en weereens baie tegniese ondersteuning gebied.

Alex het ook vir ons 50 klein **sonkrag radiotjies** in die hande gekry. Die radiotjies het oor vele landsgrense en deur verkillende lughawens in die bagasie van 'n verkeidenheid broers en susters gereis en in November veilig by ons aangeland. Ons wil die radios aan strategiese pesone uitdeel, waar ons hoop radioklubs sal ontstaan.

Nuwe ateljee



Ateljee Bou

Luis en Christovão het baei gehelp met die bouwerk aan die nuwe ateljee. Dit gaan ons opname kapasiteit aansienlik uitbrei.

Ons het uiteindelik afgeskop om een van die vertrekke in die 'studio-gebou' in 'n ekstra ateljee vir opnames te omskep. Alex het ons ook hierin gehelp deur twee mikrofone wat nie vir ons gebruik geskik was nie, te verkoop en so die nodige toerusting vir die 2de ateljee te koop.

Andries en die werf werkers het aan die werk gesprong: nuwe deure deurbreek, elektrisiteit geskuif, plafonne geslaan en geverf. Nie meer lank nie, dan kan ons hom in gebruik neem.

Pequeue.



Ons kookus saam die drie Kusdorpie sendelinge oor die pad vorentoe, na die dreigemente.

Julle onthou vir Usene, wat gedurende die middel van die jaar gese het hy is bereid om Pequeue toe te gaan om daar 'n getuie vir Jesus te wees (vorige nuusbrief)... Dit gaan maar moeilik met hom daar. Die persoon wie se huis hy gekoop het, het hom ingedoen en hy sit nou sonder huis. Toe die YWAM-span weer ons dorp besoek, het ons gedink dit is 'n goeie idee om saam met hulle 'n besoek in Pequeue af te lê en met van die eerste bouwerk aan 'n huis te help

Terwyl die meeste van die span weg was om pale vir die huis te gaan sny, was daar opstokery in die gemeenskap. Die gerug het versprei dat ons besig was om 'n kerk te bou, en ter wille van goeie verhoudings het ons die bouery toe maar eers laat vaar.

Palma - Olumbe

As ons as buitelanders na 'n nuwe distrik sou wou verhuis, moet ons eers toestemming kry vanaf die 'Administrador' of regeringshoof van daardie distrik. Omdat Olumbe in die Palma distrik val, het ons in September pad gevat soontoe om die regering daar te woord te staan. Ons was stomgeslaan toe ons sommer dieselfde dag nog die nodige dokument in die hand kon he om ons skuif wettig te maak. Ons is die Here baie dankbaar..



Olumbe-Lalane

Oom 'Spiekeries' is die hoofman van Lalane, 'n groot en goed-afgesonderde kusdorp in Olumbe. Ons oorweeg dit om daar te vestig. Bid saam ons asb.

Onrus

Gedurende die vroeë oggendure van 5 Oktober het gewapende mans ('soldate') verskeie aanvalle op dorpe Noord van ons geloods. Vir twee dae was daar 'n oor-en-weer skietery. Die bank en polisieostasie in Mocimboa da Praia was die hoofteikens. Alhoewel die situasie onder beheer gebring is, is daar steeds mense (insluitende 3 polisiemanne en 2 distrikshoofde) in die daaropvolgende weke doodgemaak.

Dit lyk of daar twee uiteenlopende groepe **hande geneem** het om hierdie aanvalle te orkestreer. Ten eerste: Die jongmense het hulle militêre opleiding by sekere fundamentalistiese moskees wat aan A[shabaab gekoppel is ontvang. Tweedens, is daar sterk sprake dat die vorige president en 'n groep wat aan hom lojaal is, die area wil destabiliseer. Dit is die gebied waar groot gasontwikkelings beplan word. Sekere amptenare in hōe poste (hoof van polisie) is afgedank, terwyl die uitvoerende distrikhoof vd polisie wapens aan die 'soldate' gelewer het.

Die gebied waarheen ons beplan om te skuif, **Olumbe**, was die afgelope weke die skuilplek van die 'rebellé' wat gevlug het. Drie weke gelede is daar groepe soldate, wat vanuit Tanzanië gekom het, gevang. Op die oomblik is die situasie kalm, en hoop ons dat hiedie aanvallers 'n nekslag toegedien is..



Lalane dorp is baie geraak deur die aanvalle.

Toekomsplanne - naby en verder

Daar word steeds gesoek na die **regte persoon** om ons plek hier by die radio in volgende jaar oor te neem, asook 'n Mwani omroeper. Een bestuurderskandidaat is van die hand gewys, terwyl 'n volgende een nou ge-evalueer moet word. Bid vir die Here se leiding.



Korrespondente

Abilio leer die twaalf nuwe 'kolegas' hoe om nuusberigte en onderhoude te voer. Dit is ons poging om nader aan die mense te beweeg deur nuus-dekking vanuit die dorpies.

Die afgelope naweek het ons **opleiding aan 12 'korrespondente'** aangebied. Hulle is vrywilligers wat ons wil gebruik om plaaslike nuus vanaf hul dorpies en omgewing aan Radio Nuru deur te gee. Abilio het die meeste vd opleiding aangebied en het hom besonder goed van sy taak gekwyt..

Williams Phiri wag nou al maande vir sy visum. Ons sou graag as span al wou begin met praktiese voorbereiding vir ons skuif Olumbe toe.




Bid dat die Here die pad vir ons sal oopmaak.

Ons **besoek Suid-Afrika** DV vanaf middel Januarie. Andries se kniee vra eers mediese aandag, en daarna wil ons by vriende en familie kuier, sowel as soveel ondersteuners as moontlik besoek. Kontak ons gerus dat ons 'n afspraak kan maak

Werfnuus

Pieter en Elsje Diener van Stellenbosch kry dit reg om 1 Kor 13 deur hulle lewens te spieëlbeeld. Hulle het ons op vele wyses ondersteun.



DIENER Pieter

Pieter oorlede

Die Dieners ondersteun ons al dekkes lank. Hy is kosbaarder as al die goud vd aarde en ons staan onbeholpe voor Elsje en hulle kinders se verlies

13 September 1946 - 26 September 2017

Elke nou en dan is daar 'n **tegniese- of eletroniese krisis** net voor ons op die lug moet gaan. Sondag het weerlig die "DB" getref en moes Andries verskeie

skakelaars vervang voor ons op lug kon kom. Die afgelope maand was daar gereelde tegniese 'uitdagings'. Met baie groot genade was ons in al die jare, nog nooit langer as 'n paar minute van die lug af nie. Ons loof ons Vader wat ons beskerm.

Onthou om saam met ons te bid. Daar is steeds heelwat veranderinge en besluite

wat in die volgende maande geneem moet word.

Ons gaan DV van 25 Januarie vir kuiers in Suid Afrika beskikbaar wees. Kontak ons gerus via whatapp of E-pos.

Andries: +27 81 891 1951

Sunette: +258 87 218 7023

Met kersfees wat al so naby is wens ons julle graag 'n baie geseënde tyd saam

familie en vriende toe.

Baie dankie vir julle ondersteuning. Ons waardeer elke gedagte, gebed, briefie en bydrae baie.

Groetnis,
Andries en Sunette

Rekeningnaam: World Outreach SA – Mission Account **Bank en tak:** Standard Bank, Potchefstroom **Rekeningnommer:** #200656783 **Verwysing:** Schwartz. – voeg u eie naam/van ook by asb.